

VENDIM
Nr. 78, datë 26.11.2018

**PËR DISA SHITESA DHE NDRYSHIME NË VENDIMIN E KOMISIONIT
KOMBËTAR RREGULLATOR NR. 51, DATË 2.12.2016, “PËR LICENCIMIN E SHA
UJËSJELLËS MALËSI E MADHE”, I NDRYSHUAR**

Në mbështetje të neneve 13, 14, 15, 16 dhe 17, të ligjit nr. 8102, datë 28.3.1996, “Për kuadrin rregullator të sektorit të furnizimit me ujë dhe largimit e përpunimit të ujërave të ndotura”, i ndryshuar (ligji nr. 8102), VKM nr. 958, datë 6.5.2009, “Për miratimin e kategorive të licencimit dhe të procedurave për aplikim për licence” (VKM nr.958), si dhe vendimit të Komisionit Kombëtar Rregullator nr. 29, datë 8.12.2009, “Për procedurat e dhënies dhe rinovimit të licencave profesionale për subjektet juridike e fizike që ushtrojnë veprimtari në sektorin e furnizimit me ujë dhe largimit e përpunimit të ujërave të ndotura”, e ndryshuar (Rregullore e licencimit),

Komisioni Kombëtar Rregullator,

në mbledhjen e datës 26.11.2018, pasi shqyrtoi dokumentacionin e paraqitur nga Drejtoria Tekniko-Ekonomike dhe Drejtoria Juridike mbi kërkesën e shoqërisë Ujësjiellës Malësi e Madhe sh.a., për ndryshimit të licencës për shkak të shtimit të kategorisë së shërbimit të largimit të ujërave të ndotura,

VËREN SE:

1. Shoqëria “Ujësjiellës-Kanalizime Malësi e Madhe” (UK Malësi e Madhe), me shkresën nr. 1462 prot., datë 21.9.2018, me lëndë “Dërgim dokumentacioni” dhe shkresën nr. 1555, datë 25.10.2018, “Dërgim dokumentacioni” ka paraqitur kërkesën dhe dokumentacionin e nevojshëm pranë Entit Rregullator të Sektorit të Furnizimit me Ujë dhe Largimit e Përpunimit të Ujërave të Ndotura (ERRU), për shkak të shtimit të kategorisë së shërbimit për largimin e ujërave të ndotura, të shoqëruar me dokumentacionin sipas përcaktimeve të parashikuara në VKM-në nr. 958 dhe Rregullores së licencimit.

2. Komisioni Kombëtar Rregullator (KKRR) e gjeti paraqitjen e kërkesë për rinovim licence për efekt të shtimit të kategorisë për largimin e ujërave të ndotura UK Malësi e Madhe në konformitet me kriteret dhe procedurën e parashikuar në VKM nr. 958 dhe Rregulloren e licencimit, si dhe në zbatim të parashikimeve të VKM-së nr. 63, datë 27.1.2016, “Për riorganizimin e operatorëve që ofrojnë shërbimin e furnizimit me ujë të pijshëm, grumbullimin, largimin dhe trajtimin e ujërave të ndotura” (VKM nr. 63).

3. Ujësjiellës Malësi e Madhe ka përditësuar ekstraktin e regjistrit tregtar për efekt të shtimit të kategorisë së shërbimit për largimin e ujërave të ndotura dhe ndryshimit të emrit të shoqërisë me dokumentacionin si më poshtë:

- Me vendim të Këshillit Bashkiak Malësia e Madhe nr. 149, datë 25.7.2018 është vendosur kalimi i sistemit të kanalizimeve pranë shoqërisë Ujësjiellës Malësi e Madhe sh.a.;

- Me vendimin e Asamblesë së Përgjithshme të shoqërisë Ujësjiellës-Kanalizime Malësi e Madhe nr. 6285 prot., datë 28.9.2018 është miratuar zmadhimi i kapitalit të shoqërisë me marrjen e aseteve për ofrimin e shërbimit të largimit të ujërave të ndotura;

- Me vendimin e Asamblesë së Përgjithshme të shoqërisë Ujësjiellës-Kanalizime Malësi e Madhe nr. 6791 prot., datë 25.10.2018, “Mbi ndryshimin e emërimit të shoqërisë Ujësjiellës Malësi e Madhe”.

4. Referuar kërkesës dhe dokumentacionit shoqëruar, rezulton:

a) ERRU-ja ka licencuar shoqërinë Ujësjiellës Malësi e Madhe me vendim nr. 51, datë 2.12.2016, “Për licencimin e sh.a. Ujësjiellës Malësi e Madhe”, i ndryshuar me një afat 4-vjeçar, ku shoqëria autorizohet të ofrojë shërbimin e grumbullimit dhe shpërndarjes së ujit për konsum publik;

b) Shoqëria UK Malësi e Madhe ka marrë në administrim sistemin e kanalizimeve nga Bashkia

Malësi e Madhe dhe do të ofrojë shërbimin e largimit të ujërave të ndotura për 3500 banorë në njësinë administrative Koplik;

c) Shoqëria ka ndryshuar emrin nga shoqëria “Ujësjellës Malësi e Madhe” sh.a. në shoqëria “Ujësjellës-Kanalizime Malësi e Madhe” sh.a.

5. ERRU-ja në vlerësimin e kërkesës për shtimin e kategorisë së shërbimit për largimin e ujërave të ndotura ka marrë në konsideratë përmbushjen nga ana e Ujësjellës Malësi e Madhe sh.a., të:

a) Kërkesave të ligjit nr. 8102, si dhe të akteve nënligjore dhe kuadrit rregullator në fuqi, në mënyrë të veçantë të garantojë që të licencuarit të veprojnë në përputhje me kushtet e licencës së tyre dhe të mbrojnë interesat e konsumatorëve në lidhje me cilësinë, efikasitetin, vazhdueshmërinë dhe garancinë e shërbimit;

b) Kërkesave të ligjit nr. 9121, datë 28.7.2003, “Për mbrojtjen e konkurrencës”, të ndryshuar (ligji nr. 9121) për mos lejimin e abuzimit me pozitën dominuese në treg të ndërmarrjes veçanërisht në lidhje me kufizimin e tregjeve;

c) Kërkesave të ligjit nr. 9902, datë 17.4.2008 “Për mbrojtjen e konsumatorëve”, të ndryshuar (ligji nr. 9902);

d) Kërkesave të VKM-së nr. 63, veçanërisht në lidhje me organizimin e njësive të shërbimit të furnizimit me ujë dhe kanalizimeve si shoqëri aksionare sipas sistemit me një nivel administrimi dhe funksionimit në bazë të ligjit nr. 9901, datë 14.4.2008, “Për tregtarët dhe shoqëritë tregtare”.

6. ERRU-ja, në bazë të vlerësimit dhe verifikimeve të kërkesës së Ujësjellës Malësi e Madhe rekomandon:

- Shoqëria UK Malësi e Madhe duhet të punojë në drejtim të zgjerimit të zonës së shërbimit në mënyrë që të gjithë konsumatorët të marrin shërbimin e largimit të ujërave të ndotura nga kjo shoqëri me cilësi dhe brenda standardeve;

- Shoqëria UK Malësi e Madhe duhet të aplikojë pranë ERRU-së për miratimin e tarifave për shërbimin e largimit ujërave të ndotura.

Për gjithë sa më sipër, Komisioni Kombëtar Rregullator, pasi arriti në përfundimin se kërkesa e UK Malësi e Madhe është e bazuar ligjërisht dhe plotëson kërkesat ligjore të parashikuara në kuadrin rregullator në fuqi,

VENDOSI:

I. Titulli i vendimit të Komisionit Kombëtar Rregullator nr. 51, datë 2.12.2016, “Për licencimin e sh.a. Ujësjellës Malësi e Madhe”, i ndryshuar, ndryshon si më poshtë:

“Për licencimin e Ujësjellës-Kanalizime Malësi e Madhe sh.a.”

II. Kudo në vendimin nr. 51, datë 2.12.2016, “Për licencimin e sh.a. Ujësjellës Malësi e Madhe”, i ndryshuar, togfjalëshi “sh.a. Ujësjellës Malësi e Madhe” ndryshohet si më poshtë:

“Ujësjellës-Kanalizime Malësi e Madhe sh.a.”.

III. Në pikën 2 të vendimit shtohet kategoria si më poshtë:

“Kategoria C, Për largimin e ujërave të ndotura”.

IV. Pika 3 e vendimit ndryshon si më poshtë:

“Zona e shërbimit të këtij operatori sipas kategorive është si më poshtë:

Kategoria A, Për grumbullimin dhe shpërndarjen e ujit për konsum publik - Bashkia Malësi e Madhe;

Kategoria C, Për largimin e ujërave të ndotura – Njësia Administrative Koplik”.

Ky vendim hyn në fuqi menjëherë.

Ky vendim publikohet në Fletoren Zyrtare.

KRYETARI
Ndrëçim Shani